



ARUBA

DISCURSO NACIONAL DI MINISTER PRESIDENT

MR. HENNY EMAN

Aruba, 30-9-1988.

Apreciable conciudadano,

Bon nochi,

Mayan Minister di Bienestar General,
mr. Mito Croes y mi persona lo sali ariba
un mision cu a cuminsa casi 3 ana pasa.

Na momento cu nos a inicia nos goberna-
cion nobo enfrente di un^{di} Aruba su peor
crisisnan nos a compromete nos mes pa
pone nos pais bek ariba pia, creando
trabao atrobe pa nos hendenan pa asina
nan por ofrece un existencia husto na
nan famianan.

Awe, gracias na e determinacion di nos
pueblo e recuperacion economico di nos
pais ta moviendo cu pasonan acelera.

Desempleo a baha di 40% te cu menos di
5%.

Nos turismo ta creciendo rapidamente, un cantidad grandi di trabaonan di construccion nobo y expansion ta tumando lugar.

Diversificacion di nos economia ta canando, Aruba su leyman nobo ariba tereno fiscal ta captando atencion internacional, companianan ya ta haciendo uso di e ley nobo y tur cos ta indica cu nos tin un centro financiero den construccion.

Exploracion di petroleo ta birando un realidad, e companianan mas grandi di mundo ta ^{ben} haciendo ofenta pa dia 22 di november esakinan worde haci publico y exploracion por cuminsa.

Ayera nos a firma un acuerdo cu un compania Americano Wickland Oil Company pa habri e facilidadnan di Transhipment ariba e tereno di Lago.

Cu e expansionnan den nos industria turistico nos ta bai tin mester directamente den hotelnan mas di 3300 empleado nobo.

Banda di esaki por calcula cu e efecto di expansion hunto cu tur e actividadnan nobo lo crea algun mil cupo di trabao mas.

Asina nos ta yegando na un punto cu nos tin mas cupo di trabao cu nos tin hendenan disponibel.

Esaki ta trece nos na e pregunta;
e oportunidadnan di trabao aki no mester ta pa nos propio jiunan di tera?

E mision cu nos a inicia conhuntamente 3 ana pasa tabata pa trece felicidad bek den cada cas ariba nos baranca.

Y awe nos tin e oportunidad pa uni bek nos famia y amigonan cu mester a bandona nos forzosamente pa motibo di falta di empleo.

Cu e miles di cuponan di trabao nobo e momento a yega mas liher cu nos a spera.

Y pesey mayan nos ta sali ariba un mision cu lo mester yuda nos soluciona e demanda pa personal y mas importante ainda lo trece bek hopi di nos hendenan cas pa asina nos por sigui construi e Aruba cu nos tur ta desea.

Un Aruba cu mester brinda oportunidad tambe na e cantidad di estudiantenan cu nos a manda exterior pa yuda construi e Aruba di mayan.

E mision lo establece e organisacion cu lo coordina e regreso di nos hendenan,

caminda cu nos jiunan di tera cu bini bek, ta na haltura exactamente di e oportunidadnan nobo cu nos pais ta ofrece.

Conciudadanonan,

Awe nochi, para na vispera di un mision asina, mi mester bisa cu e posibilidad aki di trece bek nos hendenan cas ta yena mi cu orguyo.

3 ana pasa mundo tabata mira un isla chikito desespera, sin oportunidad caminda su propio jiunan di tera mester a bandona su suelonan pa busca un porvenir den exterior.

Awe, apenas 3 ana despues, mundo ta mira un pais nobo cu ta sali ariba un mision pa trece bek su jiunan di tera.

Den e siguiente 10 dianan importante aki comparti cu nos e momentonan di e mision aki.....

Pa ora kloknan canta ariba anochi di Pasco nos lo por tin caba algun di nos hendenan na cas.

Nos lo raporta na nos regreso.

Masha

Danki y pasa un bon anochi.